



Sud Bosne i Hercegovine
Суд Босне и Херцеговине

Broj: S1 3 Iž 037956 20 Iž
Sarajevo, 22.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić-Čovrk, kao predsjednika vijeća, Srete Crnjak i Vesne Trifunović, kao članova vijeća, odlučujući o žalbi Milene Žuža, Palih boraca bb, Šekovići, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 22.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što je ista registrovana na više različitih adresa.

Žaliteljica je protiv navedene odluke blagovremeno izjavila žalbu navodeći da dostavlja potvrdu da je trenutno raspoređen na rad u Badovincima-Glušcima.

Centralna izborna komisija Bosne i Hercegovine u odgovoru na žalbu predložila da se žalba odbije.

Ispitujući pobijanu odluku u okviru žalbenih navoda, vijeće Apelacionog odijeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da su za Milenu Žuža dostavljene tri (3) prijave na obrascu PRP-1- Prijava za glasanje izvan BiH, te su navedene različite adrese na koje će biti upućen glasački materijal. U konkretnom slučaju u prvoj prijavi, upućenoj sa email adrese zuzamilena982@gmail.com je navedena adresa Beogradska 35, Mali Zvornik, Srbija. U drugoj prijavi, koja je upućena putem pošte, navedena je ista adresa, dok je u trećoj prijavi, upućenoj sa email adrese gitaragitara706@gmail.com navedena adresa Svetislava Alempića bb, Badovinci-Glušci, Srbija. Takođe je uz žalbu, dostavljena i potvrda, izdata od firme „Ž & K - MONT“ u kojoj je navedeno da je žaliteljica privremeno zaposlena u tom kolektivu i raspoređena na obavljanju radnih zadataka u Badovinci-Glušcima

I po shvatanju apelacionog vijeća, druga, odnosno treća dostavljena prijava žaliteljice Milene Žuža se ne može smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositeljica žalbe podnošenjem druge odnosno treće prijave nije ukazala da ima saznanja o podnesenoj prvoj prijavi, kada bi se moglo cijeniti da treća podnesena prijava predstavlja promjenu podataka o boravištu u inostranstvu. Takođe i potvrda koju je priložila uz žalbu o privremenom zaposlenju u stranoj firmi, s obzirom da ista nije izdata od strane nadležnog organa, se ne može smatrati dokazom o prebivalištu izvan BiH.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako žaliteljica nije Centralnoj izornoj komisiji BiH dostavila, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovana, prava adresa njenog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužan dokazati podnositelj prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Dinka Bešlagić-Čovrk